

08 MAY 1997

Mahathir-Lawatan

MALAYSIA TAWAR DIRI UNTUK TURUT SAMA ATASI MASALAH DI AFRIKA

KUALA LUMPUR, 8 Mei (Bernama) -- Perdana Menteri Datuk Seri Dr Mahathir Mohamad berkata Malaysia bersedia untuk turut memainkan peranan dalam usaha bagi mengatasi masalah di negara-negara Afrika.

Dr Mahathir berkata beliau membuat tawaran itu semasa mengadakan perbincangan dengan Presiden Afrika Selatan Nelson Mandela di Cape Town semalam.

Mandela sedang memainkan peranan utama di Afrika dan sedang terlibat dengan usaha untuk menyelesaikan banyak masalah di benua itu, kata beliau kepada pemberita sekembalinya hari ini dari lawatan selama seminggu ke tiga negara di selatan Afrika, Malawi, Botswana dan Afrika Selatan.

"Kita bincang tentang masalah-masalah di Afrika dan bagaimana kita dapat mengatasi masalah cara dia (Mandela), sama ada kita dapat memainkan apa-apa peranan, kita tawarkan diri kalau ada yang kita boleh buat, kita akan tolong," kata beliau.

Semasa di Cape Town Dr Mahathir menerima anugerah tertinggi Afrika Selatan, "Order of Good Hope (Kelas Pertama), sebagai penghargaan terhadap kecemerlangan kepimpinan beliau di Pertubuhan Bangsa-bangsa Bersatu, Pergerakan Berkecuali (NAM) dan forum-forum antarabangsa lain. Mandela telah menyampaikan anugerah itu kepadanya

Mengenai Dialog Antarabangsa Selatan Afrika (SAID) di Botswana yang beliau turut mengambil bahagian, Dr Mahathir menyifatkannya sebagai amat berguna untuk mengenalpasti masalah yang dihadapi oleh negara-negara Afrika dan cara pembangunan dilaksanakan.

Perdana Menteri ialah satu-satunya pemimpin bukan Afrika yang hadir pada dialog itu.

Kata beliau, kebanyakan peserta SAID hadir pada Dialog Langkawi di Malaysia tahun lepas dan mereka menjadikan Dialog Langkawi sebagai contoh.

"Mereka menerima pendekatan yang dibuat oleh Malaysia untuk membangunkan negara dan mereka ingin bertukar-tukar fikiran dengan kita tentang cara-cara membangunkan negara-negara Selatan Afrika," katanya.

Mengenai lawatannya ke Malawi pula Perdana Menteri berkata, negara itu mahu mengeratkan hubungannya dengan Malaysia dan meminta negara ini melabur bagi mempesatkan lagi pembangunannya.

Malawi yang kini sedang menjalani proses pembangunan semula mempunyai potensi yang baik tetapi memerlukan banyak pelaburan yang mesti datang dari luar, tambahnya. -- BERNAMA

TM WAT